

Gaoioiga Suesue 2:

Saili e Faia le Finagalo o le Alii ma le Le Faavaivai

Tomanatu i se taimi na talosagaina ai oe e fai se mea sa foliga mai e faigata tele. Na tuuina atu e le Alii i le perofeta o Nifae poloaiga faigata ina ua Ia talosagaina o ia e valaau atu i sa Nifae amioleaga ia salamo. E ui ina sa faigata, ae sa galue ma le filiga Nifae e mulimuli i le finagalo o le Alii.

Faitau le Helamana 10:4–5 ma vaavaai mo mea na fetalai atu ai le Alii ia Nifae o se taunuuga o lona faamaoni.

O se upumoni e tasi e mafai ona tatou aoao mai i nei fuaiupu e faapea, a tatou saili e faia le finagalo o le Alii ma auauna atu ia te Ia ma le le faavaivai, o le a faamanuiaina i tatou e le Alii i le tele o auala.

- O le a se mea e mafai ona faafaigata ai ona manao e fai le finagalo o le Alii?
- O le a se mea e mafai ona e manatua e uiga i le Alii lea o le a faigofie atili ai ona mulimuli i Lona finagalo nai lo lou lava lotu?

O le upu *lē faavaivai* i nei fuaiupu o lona uiga o le le vaivai po o le filigā.

- O a nisi o auala na auauna atu ai Iesu Keriso i le Tama Faalelagi ma le le faavaivai?
- E mafai faapefea ona e auauna atu i le Tama Faalelagi ma Iesu Keriso ma le le faavaivai i o tatou aso?

Mafaufau i se sini e mafai ona e faia e saili ai le finagalo o le Tama Faalelagi ma auauna atu ai ia te Ia ma le le faavaivai. Mafaufau e faamaumau lau sini i totonu o lau api faamaumau mo suesuega.

Gaoioiga Suesue 3: O Le Mana o Faamauga

Vaai faalemaufau i le tuuina mai e le Alii ia te oe o le mana e fai ai so o se mea e te ole atu ai ia te Ia. I le perofeta o Nifae, na fetalai atu ai le Atua o le a Ia tuuina atu soo se mea na manao i ai Nifae ona o le a ia “le ole [atu] i se mea ua le tusa ai ma le finagalo [o le Atua]” (Helamana 10:5).

Faitau le Helamana 10:7, ma vaavaai mo se tasi o mea na tuu atu e le Alii ia Nifae le mana e fai ai.

O le mana o loo faamatala mai i le fuaiupu 7 ua ta’ua o le mana o faamauga. Mai lenei fuaiupu, ua tatou aoao ai e faapea, o le mana o faamauga e fusia ma tatalaina i le lalolagi ma i le lagi. Atonu e fesoasoani le iloa e faapea o le fusia o lona uiga o le sosoo po o le faafesootai ma le tatalaina o lona uiga o le motusia po o le soloia.

O le mana faamau o loo ta’ua i le fuaiupu 7 o le mana lava lea e tasi o faamauga na umia e Elia (tagai 1 Tupu 17:1), Peteru ma aposetolo (tagai Mataiao 16:15–19; 18:18), ma Iosefa Samita (tagai Mataupu Faavae ma Feagaiga 132:46). O ki o lenei lava mana e tasi o loo umia i aso nei e le Peresitene O Le Ekalesia a Iesu Keriso o le Au Paia o Aso e Gata Ai ma i latou o e e mafai ona ia faamatuu atu i ai. Faatasi ai ma lenei mana, e mafai ai ona faamauina faatasi aiga e faavavau e ala i sauniga o le malumalu.

- Aisea e te manatu ai e finagalo le Tama Faalelagi ia tatou osia feagaiga e faatatau i lenei olaga ma le olaga a sau?
- O a ni auala ua faamanuiaina ai oe e le malamalama e mafai ona faamauina aiga e faavavau?
- E mafai faapefea e le malamalama e mafai ona tuufaatasia aiga e faavavau ona aafia ai ou mafauauga po o filifiliga i le taimi nei?